

**LA VITTORIA DEGL' ITALIANI IN AFRICA**  
nei pressi d' AGORDAT contro i DERVISCI  
nella battaglia dei 20 Dicembre 1893

**POESIA IN DIALETTO ROMAGNOLO**

Dop ot an i nost soldè  
i la in Africa chiè andè  
quest le l' unica vittoria  
cla potrà marchè la storia.

Me a sò un ca so imparziel  
an degh brutt ma quel che bel  
a perle giust a perle french  
se al ielt volti iera mench  
non per quest i se battù  
con corag fin chià puttù,  
se pu ià pers iera un pluton  
in confront d' un battaion.

Stavolta ancora an fu divers  
iera in poch, però i na pers,  
sebben tremilla chiesa i nost  
e Lor diesmilla e ti su post  
ià subi na gran disfata  
chià battù la ritirata.  
e ch' ritirata fulmineda?!..  
ià curs via d' gran scapeda  
per chi mont con strid e dul  
chei basteva i tach te cul.

Ades però av farò e raccont  
se fu t' un pien, se fu t' un mont,  
tla collena o tla palluda  
dò chià fat sta gran battuda;  
av dirò quant i ne mort,  
all' ospedel quant i na port  
insomma ades av cont e fat  
dla baruffa d' Agordat,

Sta bataia i la a deda  
camminand a meza streda  
da *Massua* andè a *Kassala*,  
iè di mont e pu una vala  
con un fium ches cema *Bercà*  
clè e confein ossia la merca  
d' una masa d' cli tribù  
di *Bagos*, di *Beit Taku*,  
di bei *Mensa*, di *Maria*,  
*Agordat* le per cla via.

Donca tutti stel tribù

mi *Dervisc* i ni vo più,  
per motiv cle di ladron,  
chi rubba bov, chepre, monton,  
dura od elta marcanzia  
quel chi trova i porta via.

Quand i vidd che iera i nost  
i *Tribnterie* i là at chi post  
a *Karen* fortifiched  
ià dmandè des alleed;  
per combatie in compagnia  
in ches ch' iaves qualca razzia.

I nost allora ià azzetè  
a pat chi fiss però e soldè:  
allora quist i fu content  
i fu arroled ti reggiment  
cle cla raza d' patatuch  
nominated i *bas buzuch*.

Second quel che sa capise  
tutt la rabia di *Dervisc*  
cla ià spint a vnis a bat  
contra i nost e fu ste fat.

Però prima d' raccontè  
la baruffa me a voi fe  
tutta quant la discrizion  
di *Dervisc* dla su nazon.

Le una raza d' Africhen  
de Sudan i ne cristien  
i cred *Maument* i cred *Alà*  
per pontefic ià e *Mandè*:

I vend i fioi là cherna umena  
com i bov bestie da lena  
i marchent i qua da non,  
ma al petenz con i cannon  
i sta attent ch' in pondè invell  
ad imbarchè sti por burdell.

In quand pu la su figura,  
grand' piuttosto ià la statura,  
ner l' istess come i carbon,  
ià del iongi da leon,  
cavill rizz e senza i baf,  
un nes d' insò come sti gnaf,

abre iuss come e scarlat,  
di dent biench che per e lat;  
poch i ne chi va vistid  
si ne qualdun le tip da rid  
i porta indos na lunga vesta  
meda i pi sina la testa  
rappezed ad' ross d' turchin  
che per proprie d' iarlichin;  
cridi pu che ved cla zenta  
ma qualunque la spaventa.

Ades a torne in argoment  
a raccontè e combattiment.

Diset dè prima d' Nadel  
e venn un morr de colonel,  
( una spia, un confident )  
a di che stessa ben attent  
che i *Dervise* ( i sudanis )  
per sigur ieva decis  
da tradiment un dè o l'elt  
a *Keren* da dei l'asselt.

Dop na nova i chse cattiva  
i nost soldè poch i dormiva.

Finalment ai vent d' Brumma  
( e spionag i là e costumma );  
e venn na nova che i nemigh  
iera fitt come al formigh  
ammased di drè d' un mont  
che appena nota iera pront  
a dei l'asselt per es sigur  
quand e sera fat più secur;  
( siccom lor le di bigat )  
( chi ved lum l' istess di gat. )

Ma Arimondi poc qua . . .  
e mis iu marcia i battaion,  
i cannonier con chi scioplett  
et ià appozed un d' chi brudett  
chi salteva come i grill,  
sgabaned ei na più mill,  
e ià tolt senta bandier  
la uccis e conduttier  
e gros *Ras Hamed Alè*  
e rimanent pu ià fuzi  
s' un pipacul s' una paura  
ca scomett chi corr ancora.

Di nost le mort un capiten,  
un furrier clera romen,  
un tenent, du sott tenent  
di soldèd i ne mort zent;  
zent e vent iera i ferid  
an so se tutt i se guarid

ma quii ch' era mortalment  
i sarà andè a trovè chielt zent.  
i sufferid ià port via  
nissun sa pu quant i sia.

Me finid a ho la storia  
mi nost chi god per sta vittoria  
a voi fei una profezia  
ià trov da fe s' una genia  
s' in sta attent e ben accort  
da un moment all' elt iè mort!  
sa ne un giorno sarà cielt  
ii da e zachett con un asselt!

Da domei ti su paes  
a ne ste bon nienca ingles,  
sarà l'affer d' un pera d' an  
chià scoped e Re Giovan,  
chi bata pu dla sentinella  
se mi nost ei prem la pela.

E pu una cosa me n' intend ! . .  
se chi morr i la is difend,  
a digh, in ultme i na rason?  
cosa ei andè a romp i botton ? !  
per portei dla ziviltà  
come quella ca em i qua ? ! . .

Se per ches i nost borghes  
iaves d' andè ti su paes  
allora se chi por moritt  
chiè condid arost e fritt ! !  
i trovarà dla zenta d' cor  
chii metrà tna gabia d' or  
bela, lucida a scomett  
ma però senza casset.

Sarà mei alfin di cont  
chis la pasa ti su mont  
tra al su tigre è i su leon  
canè chi casca sotto d' non.

Sarà e mi di un apprezzament  
ma i saria più content ! . . .  
e se chi morr i l' imparass  
da qualdun che i la iandass  
che me a perle per su bein  
in um daria di quattrein  
che da battie i na i mettal,  
ma qualca scimmia per regal,  
che me a farebb raspè e grupon  
ma iusurai i qua da nun.

P. Letteraria

G. VILLA